

17 JUN 2003

Umno-Puteri (Rangkuman)

PENYERTAAN PERGERAKAN PUTERI CATAT SEJARAH PERHIMPUNAN UMNO

KUALA LUMPUR, 17 Jun (Bernama) -- Upacara pembuka tirai Perhimpunan Agung Umno 2003 di sini malam ini bukan sahaja mencipta satu sejarah, tetapi turut dibayangi oleh satu senario yang belum pernah wujud pada persidangan-persidangan terdahulu.

Buat pertama kali sejak 57 tahun penubuhannya, upacara pembuka tirai itu iaitu perasmian serentak persidangan pergerakan-pergerakan yang menjadi sayap utamanya iaitu Pemuda dan Wanita pada kali ini turut membabitkan satu lagi sayap baru iaitu Pergerakan Puteri Umno.

Sejak diasaskan kira-kira tiga tahun yang lalu, inilah kali pertama Pergerakan Puteri yang kini dianggotai lebih 100,000 anak muda serikandi negara diletak setaraf dengan Pergerakan Pemuda dan Wanita.

Upacara perasmian itu dilakukan oleh Timbalan Presiden merangkap Timbalan Perdana Menteri Datuk Seri Abdullah Ahmad Badawi. Persidangan penuh ketiga-tiga pergerakan itu akan berjalan selama sehari esok.

Kehadiran para perwakilan Pergerakan Puteri itu jelas memberi wajah dan nafas baru kepada persidangan pada kali ini. Sekurang-kurangnya ia dapat sedikit sebanyak mengembalikan keceriaan kepada perwakilan yang ternyata terus dibayangi oleh isu pengunduran Perdana Menteri Datuk Seri Dr Mahathir Mohamad Oktober depan.

Walaupun para perwakilan kelihatan begitu khusyuk mengikuti ucapan Abdullah yang membawa pemikiran mereka jauh menerokai masa depan bangsa, agama dan negara, isu pengunduran Dr Mahathir itu tetap mempengaruhi raut wajah setiap perwakilan ketiga-tiga pergerakan itu.

Isu yang sama juga dijangka mendominasi dewan persidangan pergerakan masing-masing esok dan seterusnya selama tiga hari berlangsungnya Perhimpunan Agung Umno mulai Khamis ini.

Dr Mahathir telah mengumumkan hasratnya untuk melepaskan jawatan Perdana Menteri dan Presiden Umno Oktober depan pada perhimpunan agung tahun lepas. Beliau juga telah menamakan Abdullah sebagai penggantinya.

Sentimen yang benar-benar mengusik emosi perwakilan dan semua anggota Umno yang hadir pada perhimpunan kali ini ialah hakikat yang tidak mungkin boleh berubah lagi - bahawa perhimpunan agung Khamis ini adalah perhimpunan terakhir yang menyaksikan Dr Mahathir menyampaikan ucapan dasar dan amanat dalam kapasitinya sebagai Presiden parti dan Perdana Menteri.

Setelah lebih 20 tahun menerajui parti dan berdiri di atas pentas perhimpunan agung tahunan itu dalam kedua-dua kapasiti tersebut, reaksi yang dipamerkan oleh anggota Umno keseluruhannya tentulah boleh difahami.

Mereka terpaksa belajar menerima hakikat bahawa pengunduran Dr Mahathir tidak akan sekali-kali memutuskan kesinambungan perjuangan Umno.

Berasaskan ucapannya ketika merasmikan persidangan ketiga-tiga pergerakan itu yang bernas dan padat dengan wawasan, semangat dan nasihat, Abdullah tanpa ragu-ragu lagi mampu meneruskan kesinambungan itu.

-- BERNAMA

AM KHY MOZ